

Jí² gasii¹ in San Pablo tíi²i tsá² 'in néei¹ Colosas

Sii¹in Poo² 'e jí² lo tya' tsá² jai² líi² Cristo 'in néei¹ Colosas

1 1-2 Jna-a, Poo², 'in sii³na 'e jí² lo tyii' 'in jai² líi² Jesucristo 'in néei¹ coon²¹ fuu²¹ sii²¹ Colosas. Joon líi¹na apóstol tya' Jesucristo to² tyu¹² Dios Jmii²¹. Sii²¹na'a 'e jí² lo coon¹³ tsaru^{1u} Timoteo tyi'naa' 'in tsaru^{1u} 'in jai² líi² Jesucristo. Cwotaan²¹ Ña'ñu^{1u} Dios Jmii²¹ 'naa' cwa¹³ joongi cwocwo¹ 'naa' 'e seen²¹naa' 'e tyú².

Faa²¹ Poo² júu³ tyú² 'wii²¹² tya' 'in jai² líi² Jesucristo

3 Coon²¹ tøø²mo cwoo²¹ o'o 'maai¹³ Dios Jmii²¹, 'in Jmii²¹ Ña'ñu^{1u} Jesucristo, la coon²¹ naa¹³ mo faa²¹a'a júu³ tyú² 'wii²¹² tyii'. **4** Nilinée³e'e júu³ 'e ja²mo líi²naa' Cristo Jesús, joongi xiiala 'iin²¹²moo' jileei²¹ 'in jai² líi² Dios Jmii²¹. **5** 'iin²¹²moo' 'ii tsu 'wii' injaan^{2oo} icwo¹² Dios 'naa' i'ii²¹ 'ido 'naa' fu ñu^{1fú} iní²ⁱⁱ coon¹³ Jesús jløø¹³naa'. Ca la mo 'lää² 'wii²¹² ganúu^{2uun} 'e júu³ tyú² tya' 'e tiin¹³ tsá² ga'i¹-oo' la joon. **6** Joon 'e júu³ lo 'e cwo¹ tsá² la caain²¹ juncwii²¹. Joon 'ii²¹mo tsá² 'e júu³ do la ga'ii¹³naa' la mo ganuu^{2uun} joon ja²mo galí²naa' 'e jo^{1o} 'e 'iin²¹² Dios tsá². **7** La li 'e galitii²¹naa' 'e ga'e¹ ru^{1u} Epafras, 'in 'iin²¹²na', 'in gajmaa^{1a} to² coon¹³ jna'. Joon 'ii jaain²¹ 'in jmoo^{1o} to² tyu¹² Cristo 'in cwo¹² 'naa' júu³ tyú² joongi jo cuu¹³-oo' coon¹³on. **8** Joongi 'ii gajma^{2a} jna'a júu³ xiiala seen^{2naa} joongi xiiala 'iin²¹²naa' Dios coon¹³ tsá² coon¹³ 'ii²¹ tya' 'in Espíritu Tyú² tya' Dios.

9 Tsu 'wii¹³ joon 'e jmii²¹² mo galiné³e'e xiiala jai² líi²naa' jo mo gatuu^{21u} 'e faa¹³a'a júu³ tyú² 'e mii²¹ⁱ tyani Dios Jmii²¹ 'e cwocwo^{12o} 'naa' 'e liñi²ⁱⁱ jilaa²¹ 'e 'iin²¹²in 'e jmaa^{2aa}, joongi coon¹³ tya' Espíritu Tyú² tya'a 'e øøi²¹-oo', iliní²ⁱⁱ 'e tyú², jogi jmaa^{2aa} sóoin² jon'gi wa' jo untiin¹³naa'. **10** Joongi mii²¹ⁱ 'e jmaa^{2aa} 'e tyú²-u jiin¹³ la tíi² la jmoo^{1o} 'in jai² líi² Ña'ñu^{1u} Jesucristo, jmaa^{2aa}gii' coon²¹ tøøi² jiin¹³ la 'yaa¹-tsi, joon ilicwii^{2naa} 'áai¹gi Dios Jmii²¹. **11** Mii²¹ⁱ 'wii²¹² tyii' 'e cwojmaa^{1a} Dios Jmii²¹ 'e tá²gi taain²¹²-oo' coon¹³ 'ii²¹ tya'a 'e ya²gi, 'e coon¹³ la joon 'e taa²¹-oo' jmaa^{2aa} coon¹³ ce tún², joon 'e jløø¹³moo'. **12** Cwoo^{3oo} 'maai¹³ Ña'ñu^{1u} 'in nityá² tyú² tyi' i'ii¹³na' jilaa²¹ icwo¹² Dios jileei²¹ 'ii injnee²¹ tyani Dios. **13** Joon Dios Jmii²¹ lawa'a ga'wooi¹ jna' 'e juncwii²¹ do li 'ii² nuu²¹ joon gatøø^{1ø} jna' li jná² joo²¹ li tyu^{12u} Joon¹, 'in 'iin²¹²in do to². **14** 'In Joon¹on do gajmaa^{1a} tiin¹³ jna', gajúun¹in 'wii²¹² tyi' joon ga'íin² tsaa² 'wii²¹² tyi'.

**Seen²na' 'e tyú²-u coon¹³ Dios Jmii²¹ tsu 'wii¹³
gajúun²mo Jesucristo 'wii²¹² tyi'**

15 Jiin¹³ jaain²¹ tsá² jo lí² ní²in Dios Jmii²¹. Pe mo gacwéei² Joon¹on lí¹i tsá²-a joon ganii²¹mo tsá² 'ii. Joon 'ii-o 'in nifu la jee²¹² jileei²¹ 'in seein²¹. **16** 'Wii¹³ 'ii-o gajmaa¹a Dios Jmii²¹ ni cwoo¹³ juncwii²¹ joongi coon¹³ jilaa²¹ 'e sá² yu' juncwii²¹. Joon gajmaa¹o jilaa²¹ 'e jo jnéei² la joon jon 'e jnéei². Jilee²¹mo ga'ii²¹ to² 'e tyu² 'ii xufiin¹³ 'in tsaa²to² nifu si 'in tí² tún² 'ee si 'in tí² 'ni¹ 'ee. Tsu jilaa²¹ 'e galí² 'wii¹³ 'ii-o joongi 'e tya' 'ii-o. **17** Seen²¹mo Jesucristo ca la jéei¹gi la jee²¹² jilaa²¹ 'e sá². Joon 'wii¹³ 'ii²¹ tya' 'ii-o jo xéei². **18** Joongi Cristo lí¹i mootyi² tya' jileei²¹ 'in jai² líi² 'ii. La to² tyu² mootyi² tsá², tyu²o to² la tøøi² cuerpo tya' tsá², la joon jmoo¹o Jesucristo. Joon 'ii-o cwoo¹o juncwii²¹ tya' la jileei²¹ 'in jai² líi² 'ii. 'Ii-o 'in tyiin²gi nifu la jee²¹² jileei²¹ 'in nigajiin¹ jee²¹² 'lii²¹² 'e jo júuin² tún¹ tsu 'wii¹³ la joon 'ii-o nifu la jee²¹² jilaa²¹. **19** Tsu Dios Jmii²¹ nigali'in²¹²in wa'a lí¹i Cristo ce tí² la lí¹i 'ii ña'a. **20** Joon ga'i¹-tsi jon Dios Jmii²¹ 'e 'wii¹³ tya' Jesucristo 'e seein²¹ tsá² tyú² coon¹³on. Dios ga'ín² tsaa² tya' jileei²¹ 'wii¹³ jmi¹ 'øøi² Jesucristo 'e gatuun²¹ mo júun¹in tsaa¹ crúu¹³. 'Wii¹³ coon¹³ 'e joon gajmaa¹a Dios 'e sí¹i røø²¹ coon¹³on jileei²¹ 'in taain²¹² ñu'fú² coon¹³ 'in taain²¹² juncwii²¹.

21 Joon 'naa' la mo jéei¹ jo seen²¹naa' tyú² coon¹³ Dios. 'Ee¹moo' Dios 'wii¹³ jilaa²¹ 'e gó² jmoo²oo'. Pe la no Dios gajmaa¹a 'e seen²¹naa' røø²¹ coon¹³on. **22** 'Wii¹³ tya' 'e gajúun¹in cuerpo tya' Cristo. 'E galí² 'elo 'e lawa'a sá² coon²¹ 'e cwo²o Dios Jmii²¹. Ijaain²¹ Dios Jmii²¹ 'naa' tyani 'ña'a 'e lí¹naa' tsá² jon'gi un'leei²¹gi' yaanaa', jon'gi 'e røøi²¹gi' tsaa². **23** Pe 'elo lano 'ná¹ ngí²ii' canii²mo jiin¹³ 'e jai² líi²naa'. Lawa coon²¹ jmoo³ 'mó² 'e 'yu' o² 'áai¹ 'e jo tsajan² jiin¹³xu la joon jon jo xee²-oo' jiin¹³ 'e 'øøi²¹-oo' tsu 'wii¹³ 'e júu³ tyú² 'e nanuu²uu' itiin¹³naa'. Joon nigacwoo¹ tsá² 'e júu³ lo la 'uu²¹mo ni cwoo¹³ juncwii²¹. Joon jna-o, Poo², gauncoon¹³oo cwóo³oo 'e júu³ tyú² do.

Xiiala jmoo¹o Poo² tya' 'in jai² líi²

24 Jløø¹³moo coon¹³ jilaa²¹ wúu¹ 'e móo³oo 'wii²¹² tyii' tsu coon¹³ la joon coon¹³ cuerpo tyiia li¹ii untiin¹³na jilaa²¹ wúu¹ 'e 'ná¹ ní²gi Cristo cwáain¹ tya' 'in jai² líi² 'ii. **25** Joon Dios Jmii²¹ gatyaa¹ cwóo³oo icwo¹³oo 'naa' 'e júu³ tyú² do tya' 'e tyú² tyii'. Dios Jmii²¹ gatyaa¹ cwóo³oo júu³ tya'a 'e cwóo³oo jiin¹³ la tí². **26** Ijmá³aa liñí²ii' 'e júu³ 'e la mo tá² 'ín³ 'mo² líi¹-i 'áai¹. Ce jiin¹³ ángeles jo ñii¹i la joon jon tsá² jo ñii¹i. Pe la nano Dios gacwoo¹o 'e licwii¹naa' jiin¹³ 'in lí¹i tsá² tya'a. **27** Dios ga'i¹-tsi cwo²o jileei²¹ 'in jai² líi² 'ii 'e licwii¹i 'e júu³ la mo tá² 'ín³ 'mo². Joon 'ya²gi 'áai¹ joongi 'áa¹mo tyiin² tyii' jileei²¹ 'in jon' seein²¹ Israel. Joon 'e júu³ 'ooiin²¹ do 'e jin² 'e 'yúu¹i tsi Cristo 'in tsá² 'in jai² líi² 'ii. Joon 'wii¹³ 'ii do 'øøi²¹-oo' i'ii¹³naa' li 'ya²gi icwo²o 'naa'.

28 Cwoo²¹o'o júu³ tyú² tya' Cristo. Joon cwoo²¹o'o tsá² cwáain¹ jilee²¹mo. Joon 'ee¹e'e jilee²¹mo tsá² joon cwo'øøi²¹-tsi tyú²-u. Tsa joon la jaain²¹ la jaain²¹ 'ii isaain²¹-tsi tyú²-u jilaa²¹ 'e gajmaa¹a Cristo 'wii²¹² tya'a. **29** 'Wii¹³ joon jmóo³oo to² 'ii²¹ la joon jon jmóo³-oo xiia²¹ jiin¹³ li¹ii jiin¹³ wa¹² p¹² icwo¹² Jesucristo jna.

2 **1** Tsa 'iin²¹²na 'e liñ²ii' 'e jmóo³oo xiia²¹ jiin¹³ li¹ii 'wii¹³ tyii' joongi 'wii¹³ 'in tsá² néei¹ Laodicea joongi 'wii¹³ jileei²¹ 'in jo mo níi² jna 'ñii'a. **2** La joon 'iin²¹²na 'e táain¹ tá²-tsi alma tya'a joon gauncaain²¹ tsa 'wii¹³ 'iin²¹²in la jaain²¹ la jaain²¹. 'iin²¹²na jon 'e 'øøi²¹gi¹-oo' 'e coon¹³ la joon jo cu¹²-oo' coonti. 'iin²¹²na jon 'e cwii²¹moo' Cristo. Joon jo lí² cwii¹in tsá² 'ii wa'a jo cwoo¹ Dios. **3** Tsa Dios gacwo¹o Cristo jilaa²¹ 'e 'øøi²¹-tsi tsá² coon¹³ jilaa²¹ 'e jmii¹-tsi. **4** 'E la fuu²¹²uu 'naa' 'e jo 'in icwotyiiian²¹ 'naa' too² coon¹³ júu³ tajuu²¹. **5** Xuñiin¹³ jo siin¹³na 'ñii'a coon¹³ 'naa' áa¹mo líi²na 'naa'. Joongi 'áa¹mo jløø¹³na coon¹³ 'naa' 'e untiin¹³moo' joon 'e teen¹naa' taa²¹ jiin¹³ 'e jai¹² líi²naa' Cristo.

6 La ni¹ii¹³naa' Jesucristo la joon jon 'ná¹ taan²¹²naa' juncwii²¹ 'in caan¹²naa' coon¹³on. **7** 'In caan²¹naa' coon¹³o lawa'a coon²¹ 'mó² jéei¹ jmóo³ áai¹ 'e sa¹² tá² 'e ilí¹ cwii²¹naa' Cristo áai¹gi la coon²¹ jmii²¹². Jo cwoxeei²¹-oo' jiin¹³ 'e jai¹² líi²naa' jiin¹³ la ga'e¹² tsá² 'naa'. Coon²¹ tøø²mo cwoo²oo' 'maai²¹ Dios Jmii²¹.

'E mñi² 'e juncwii²¹ tya' tsá² mo jai¹² líi² Cristo

8 Tíi¹moo', jo cwóoi¹ yaanaa' 'e caain¹ 'naa' wíin² 'in tsá² tajuu²¹ 'in tñii² júu³ 'e jóoin²-tsi tsá². Joongi jo cwo¹²o 'ido júu³ ruu²¹i coon¹³ 'e júu³ 'e jo jai¹². 'In tsá² do jo cwoo¹o júu³ tya' Cristo. Cwoo¹-o jmai¹² júu³ 'e la tiisi¹² tya' tsá², jiin¹³ la 'e 'øøi²¹-tsi yaamo.

9 Tsa lawa'a Dios Jmii²¹ 'ñáa líi¹i Jesucristo. **10** Joon 'naa' sirøø¹naa' coon¹³ Dios tsa 'wii¹³ 'in caan²¹naa' coon¹³ Cristo. Joon 'ii tyu¹² to² jileei²¹ 'in 'oo¹o to² juncwii²¹ coon²¹gi. **11** Joon 'naa' ga'ii¹³naa' 'e li² sii²¹ circuncisión, 'e jmaa¹a tsá² júu³ 'e tsá² tya' Dios 'naa'. Pe 'e li² ga'ii¹³naa' jon' gajmaa¹a tsá². 'E li² 'e nilíi¹naa' 'e Cristo gacoon²¹-o jilaa²¹ tsaa² tyii'. **12** Mo gasaa²¹naa' jmii²¹ lawa'a 'e gajún¹moo' coon¹³ jilaa²¹ 'e gó² 'i'-oo' la gajúin¹ Jesucristo. Joon mo gajmaa¹a Dios Jmii²¹ 'ii²¹ 'e gajiiin¹in Jesucristo jee²¹² 'lii²¹² la joon jon 'naa' gacwo¹o Dios Jmii²¹ 'naa' juncwii²¹ tyii' 'e 'múui² 'wii¹³ jo¹o galíi²naa' Jesucristo. **13** 'Naa' la mo jéei¹ lawa'a 'e 'lii²¹²moo' coon¹³ tsaa² tyii² 'e røø²¹naa', jo li² líi¹naa'. Pe la nano nicwo¹o Dios 'naa' juncwii²¹ tyii' caan²¹mo coon¹³ Cristo. Ga'ín²mo 'ido jilaa²¹ tsaa² tyii'. **14** Ga'ín² tsaa² tyi' 'e røø²¹na' tyaníi¹. Coon¹³ 'e tsaa² tyii² do 'e la mo tsaa²¹a li 'lii³. Mo gateein¹ tsá² Cristo tsaa¹ crúu¹³ joon gajúun¹in. Joongi gatsé¹mo 'e tsaa² røø²¹na' do. **15** Mo gajúuin² Jesucristo tsaa¹ crúu¹³ do gali¹o 'in 'lii¹³ coon¹³ jileei²¹ 'in

'oo¹o to² tya' 'in 'lii¹³. Joon coon¹³ la joon Dios ga'e¹²o jileei²¹ 'e feei¹gi Cristo lagi 'in 'lii¹³ do.

Jmaa²aa' jiin¹³ la to² tyu² Dios

16 Tsu 'wii¹³ joon jo cwóoi¹ 'naa' wa'a jma¹ tsá² 'ii²¹ tyii' coon¹³ 'e 'uu²uu' cøø²øø'. Jon'gi cwóoi¹ 'naa' wa'a jma¹ tsá² 'ii²¹ tyii' coon¹³ mo tí² jmi²¹² si jmi²¹² mo 'lää² 'wii²¹² la jaain²¹ si²¹ 'ee, si jmi²¹² mo 'ii²¹ 'woo²¹ tsá² 'ee. **17** Tsu 'wii¹³ jilaa²¹ 'elo li lawa 'iin¹³ tya' Cristo, jmaa¹a tsá² júu³ xiiala ilíi¹ Cristo ijó¹ pe najó²-o joon la no lí²-i licwii¹in tsá² 'ña'a Cristo. **18** Jo cwoo²oo' 'e cón² 'in tsá² do 'naa' too² 'e jo 'ii¹³naa' jilaa²¹ 'e sá² tyii' coon¹³ Jesucristo. 'In tsá² do jmaai²¹ yaai lawa tsá² 'wéi¹ joon un'goo²¹o ángeles. Faa²¹a 'e jo 'øøi²¹-tsi. Joon jløøi¹³ 'ña'a coon¹³ 'e 'i¹-tsi xufiin¹³ 'i¹-tsi jiin¹³ la 'i¹-tsi tsá² 'in jo cwii¹in Dios. **19** Jo ngii¹ 'in caain²¹ coon¹³ Cristo. Pe Cristo do líi¹i tsafeei¹ tya' jileei²¹ 'in jai² líi² 'ii. Joon 'ii do cwoo¹o jilaa²¹ 'e ñi¹ tsá² cwáain¹ tya' Dios Jmii²¹. 'Wii¹³ 'ii-o sicaain²¹ jileei²¹ 'in jai² líi² 'ii jiin¹³ la 'i¹-tsi Dios.

20 Mi yuui¹³ gajúin¹ Cristo 'in tsá² taain²¹² juncwii²¹ jo lí² tyu²gi to² 'ii. La joon jon jna' lawa'a jún¹mo' jon coon¹³ Cristo. Joon jo lí²gi tyu² tsá² jna' to². **21** Jo ná¹ jmoo²¹o' 'ii²¹ 'e tyu² lagi jo gø²ø si jo 'uun²¹un 'ee si jo lí²i coon¹³ cwoo²¹o 'ee. **22** Tsu jilaa²¹ 'e sá² juncwii²¹ ityé¹mo mi yuui¹³ ijméi¹ to² tya' tsá². Joon 'e 'ii²¹ 'e jmoo¹o 'in tsá² do lí² jiin¹³ la to² tyu² tsá², joon jiin¹³ júu³ 'e 'e²e tsá². **23** 'In tsá² jmoo¹o 'ii²¹ lo 'e la mo líi¹ la líi¹i tsá² 'in cwó¹-tsi jmoo¹o la to² tyu² Dios. Pe jiin¹³ jmaa²¹i yaai tsá² 'wéi¹ joon 'e¹e wúu¹ yaai. Jo 'ee to² 'íi³ jilaa²¹ 'elo tsu 'in tsá² 'in jmoo¹o la joon jmoo¹-o jiin¹³ la 'iin²¹²gi 'ña'a.

3 **1** La gajúun²naa' coon¹³ Cristo la joon jon nigajiin¹naa' tún¹ coon¹³on. 'Wii¹³ joon 'naa²¹aa' 'e sá² fu ñu'fú² li tyíin¹ Cristo lí' cwoo²¹o Dios Jmii²¹ tsáa¹. **2** Cwo'í²-oo' 'e sá² fu ñu'fú² jon' 'e sá² ni cwoo¹³ juncwii²¹. **3** Gajúun²naa' coon¹³ Cristo joon nano un'øø²¹mo Dios juncwii²¹ tyii' coon¹³ Cristo. **4** Joon Cristo 'ña'a líi¹i juncwii²¹ tyi'. Joon mi jnéi¹ Cristo tún¹ la joon jon jna' injnéi¹mo' coon¹³on. Joon 'e 'ya²gi tya'a ilisá² tyi'.

'E² Poo² tsá² xiiala teein²¹² tsá² juncwii²¹

5 'Wii¹³ joon 'ná¹ joon²¹on' jmaa²¹a' jilaa²¹ 'e 'iin²¹²na' 'e gó² 'e jmoo²¹o'. Jo foo¹³naa' tsamí² tya' tsá² xeei²¹, jon'gi jmaa²aa' doñi'ee 'e gó². Jo jmaa²aa' 'e gó² 'e 'iin²¹²naa' jmaa²aa' jon'gi 'e gó² 'e 'i¹-oo'. Jo 'iin²¹²gi' áai¹gi lagi 'a 'oo²oo' no tsu lawa'a un'goo²oo' dioses jmaa¹i tsá² wa'a jmoo²oo' la joon. **6** Joon tsu 'wii¹³ jilaa²¹ 'e gó² lo i'ee¹ Dios wúu¹ jileei²¹ 'in jo mo jmaa¹a nuu¹³. Joon 'áa¹mo wúu¹ inii² 'ido. **7** Joon 'naa' gajmaa²aa' jilaa²¹ 'e gó² lo la mo seen²¹naa' la mo jéei¹. **8** Pe nano tuu²uu' jilaa²¹ 'e gó² lo: tuu²uu' 'e 'nii²¹-oo', jo jmaa²gi' 'e 'nii²¹-oo'. Tuu²uu' jilaa²¹ 'e gó² 'e tí²-oo' joon jilaa²¹ júu³ gó² 'e foo²¹oo' tya' tsá²

xeei²¹. Tuu²uu' jilaa²¹ júu³ 'líi³ 'e sái¹naa'. **9** Jo fu²uu' tsá² júu³ tajuu²¹ la jaain²¹ la jaan²¹naa' tsu ni gatuu²oo' jilaa²¹ 'e gó² seen²¹naa' la mo jéi¹ coon¹³ jilaa²¹ 'e gó² gajmaa²aa'. **10** Joon niga'ii¹³naa' coon²¹ juncwii²¹ 'múui². Joon la coon²¹ jmii²¹² nigalicwii²ingii' Dios 'in gacwo¹ 'naa' 'e juncwii²¹ 'múui² do. Joon coon¹³ la joon tí²xu-u 'e juncwii²¹ tyii' do lisíi² ca li la li juncwii²¹ tya' Dios Jmii²¹. **11** Mo ngii¹ tsá² coon¹³ 'e juncwii²¹ 'múui² do ca nii²mo tsá² líi¹i. Jo 'e cwáain¹ tya' tsá² doñixiaa' jalín², la joon sáa³ jmii²¹ tsá² doñixiaa' jalín². Jo tyiin² joo²¹ jiin²¹ gauntsáa¹ tsá² jí² si 'ee to² tii²i tsá² 'ee. Jiin¹³ 'e tyiin²mo 'e cwii¹in 'ido Jesucristo tsu jiin¹³ 'ii 'in tyiin²gi.

12 'in²¹²mo Dios 'naa' joon gatyii¹³in 'naa' ilíin²naa' tsá² tya'a, 'wii¹³ joon cwolíi²naa' tsá² 'wo²-tsi, tsá² 'in jmoo¹o tyú² tya' tsá² xeei²¹. Jo jmaa²aa' jlóo³ pe cwolíi²naa' tsá² coon²¹ tún¹ 'in feei¹-tsi. **13** Jmaa²aa' feei¹-'oo' 'wii¹³ tya' ruu²¹naa' la jaain²¹ la jaan²¹naa'. Joon wana 'e niga'láa¹ tsá² tyii' jmaa²aa' feei¹-'oo' tya'a tsu jiin¹³ la joon gajmaa¹a Cristo tyii'. **14** Pe 'e tyiin²gi 'e 'iin²¹²naa' tsaru¹u, tsu jiin¹³ coon¹³ la joon incaan²¹naa' joon sái¹³ii' røø²¹. **15** 'Wii¹³ Cristo seen²¹naa' tyú² coon¹³ Dios Jmii²¹ tsu 'wii¹³ joon jmaa²aa' jiin¹³ la tii²i jmáa¹a 'in seein²¹ tyú² coon¹³ Dios Jmii²¹. Tsu 'yu to² joon gatø²ø Dios 'naa' 'e canii²mo ilíi²naa'. Joon cwoo²oo' 'maai¹³ Dios Jmii²¹.

16 Cwotii¹³-'oo' jilaa²¹ júu³ tya' Cristo 'e ganuu²uu'. Jmaa²aa' núu¹³uu' 'e júu³ do. 'Ee²ee' 'e júu³ do joongi tyá²-'oo' la jaain²¹ la jaan²¹naa' coon¹³ jilaa²¹ 'e 'øøi²¹-'oo' 'e gacwo² Dios. 'øø²øø' jilaa²¹ júu³ tyú² salmos coon¹³ jilaa²¹ júu³ tyú² tii²¹gi, cwoo²oo' 'maai¹³ coon¹³ 'e 'øø²øø' do. **17** Joon jilaa²¹ 'e jmoo²oo' si fó²oo' 'ee, jmaa²aa' jilaa²¹ 'wii²¹² tya' Ña'ñu¹u' Jesucristo. Joon cwoo²oo' 'maai¹³ Dios Jmii²¹ 'wii¹³ 'ii-o.

Xiiala 'ná¹ jmaa¹a 'in jai² líi² Jesucristo

18 Joon jileei²¹ 'naa' tsamí² 'in seein²¹ ñuu¹ tya'a jmaa²aa' núu¹³uu' coon¹³ ñuu¹ tyii'. Tsu coon¹³ la joon 'ná¹ jmáa¹a 'in jai² líi² Ña'ñu¹u'. **19** Joon 'naa' tsañuu¹ 'in seein²¹ tsamí² tya'a cwoli'in²¹²mo' tsamí² tyii'. Jo jmaa²aa' 'eei¹ 'naa'. **20** Jileei²¹ 'naa' 'in xuui²¹²gi' jmaa²aa' núu¹³uu' to² tyu² 'ñú²uu' coon¹³ saa²aa' tsu 'yaai¹-tsi Ña'ñu¹u' coon¹³ 'elo. **21** Joon 'naa' 'in líi¹i tsacøøi¹³ jo untyíi²naa' xuui²¹² tyii' ce tyá² 'nii²¹-tsi tsu joon jo tyuui¹²-tsi. **22** Jileei²¹ 'naa' 'in líi¹i tsa'leei¹³ jmaa²aa' núu¹³uu' to² tyu² 'ñifii²ii' 'in seein²¹ juncwii²¹ lo. Jmaa²aa' núu¹³uu' coon²¹ tøø²mo jon' wa'a jiin¹³ mo jóø²i 'naa' coon²¹ liseen²¹naa' tyú² coon¹³on. Pe cwoseen²¹naa' canii²mo un'goo²¹oo' Dios Jmii²¹. **23** Joon doñi'ee 'e jmaa²aa', jmaa²aa' 'e jløø³mo' lawa to² tya' Ña'ñu¹u' jon' to² tya' tsá². **24** Joon niñí²oo' 'e Ña'ñu¹u' icwo¹² 'naa' lawa coon²¹ 'e tii²naa' 'e i'ii¹³naa' ñu'fú² tsu jmoo²oo' to² tya' Cristo 'in líi¹i Ñi'fii²ii' la jai².

25 Joon jileei²¹ 'in jmo¹o 'e gó² i'ii²¹mo 'e lee¹³i tya' 'e gó² gajmaa¹a. Joon coon²¹ 'ii²¹ 'oo¹o Dios 'e jmáa¹a tya' la jaain²¹ la jaain²¹ tsá².

4 1 La joon 'naa' 'in líi¹naa' ñi'fii²¹² tsá² 'ná¹ jmaa²aa' 'ii²¹ røø²¹ coon¹³ tsa'leei¹³ tyii'. Cwotii¹³-oo' 'e seein²¹ jaain²¹ Ñi'fii²¹ 'ñu'fú².

2 Faa²aa' júu³ tyú² coon²¹ tøø²mo, lii²ii' jmaa²aa', cwoo²oo' 'maai¹³ Dios Jmii²¹. **3** Faa²aa' jon júu³ tyú² 'wii¹³ tyijna'a 'e cwo² Ña'ñu¹u' 'e cwoo²¹o'o júu³ tyú² tya'a. Joon 'wii¹³ 'e júu³ do 'yuu²na 'nuñi³. **4** Mí²ii' tyani Dios 'e liñi³ii tyú² xiiala ilí² cwóo³oo 'e júu³ do.

5 Ngí²ii' coon²¹ tsáa¹ tyani 'in jo cwii¹in Ña'ñu¹u' Jesucristo. Cwoo¹³-oo' jmaa²aa' 'e sá² jmaa²aa'. **6** Síi¹naa' coon¹³ júu³ coon²¹ tún². Cwoliñi²ii' xiiala ngii²ii' tya' 'in unngii¹i.

Júu³ li tséi¹

7 Joon 'in tsaru¹u' Tíquico, 'in 'iin²¹²na'a, ijma¹a 'naa' júu³ xiiala seen²¹na. Joon 'in Tíquico do nigauncoon¹³o jna 'áai¹ joon coon²¹ caan²¹mo gacwoo²¹o'o júu³ tyú² tya' Ña'ñu¹u'. **8** 'Wii¹³ joon síi²na 'ii isii²¹ 'naa' xiiala seen²¹na'a joon wa lí² tyá²-oo'. **9** Joon tsagoo¹oo' Onésimo ingi¹ coon¹³ Tíquico. Tsaa¹³-tsi Onésimo Ña'ñu¹u' Jesucristo 'áai¹ joon 'áa¹mo 'iin²¹²moo'o 'ii. Je waai¹ do ijma² 'naa' júu³ xiiala li lo.

10 Joon 'in Aristarco, 'in taai²¹² 'nuñi³ coon¹³ jna sii¹i 'aa²¹²moo'. La joon jon sii¹i Marcos, 'in líi¹i ruu²¹i Bernabé sii¹i 'aa²¹²naa' jon. Niga'ii¹³moo' júu³ cwáain¹ tya'a joon wa jafee¹³i 'naa' 'ii¹³moo' 'ii 'e tyú²-u. **11** 'In Jesús do, 'in sii²¹o jon Justo, sii¹i 'naa' jon 'aa²¹²moo'. Jiin¹³ 'in gaai²¹ no, jee²¹² tsá² Israel 'in jai² líi² Cristo, gauncoon¹³o jna cwoo²¹o'o júu³ tyú² tya' Dios. Joon gacwo¹o jna fo'fee¹i 'áai¹. **12** 'In tsagoo¹oo' Epafras sii¹i 'aa²¹²moo'. Tsá² jmaa¹a to² tyu² Cristo 'ii joon 'áa¹mo mii¹i tyani Ña'ñu¹u' 'wii²¹² tyii'. Mii¹i tyani Dios 'e taan²¹²naa' tá² táain¹-oo' joon 'e ñii²¹oo' jilaa²¹ 'e 'iin²¹²in Dios Jmii²¹ 'e jmaa²aa'.

13 Tsu jna-a jmóo³oo júu³ xiiala cu²-tsi Epafras tyii' joongi tya' 'in néei¹ fuu²¹ Laodicea coon¹³ 'in néei¹ fuu²¹ Hierápolis. **14** 'In timí¹ Lucas, 'in 'iin²¹²na'a, sii¹i 'aa²¹²moo'. La joon jon Demas sii¹i 'aa²¹²moo'.

15 'Aa²¹²mo fuu²¹uu' 'in jai² líi² Cristo 'in néei¹ fuu²¹ Laodicea. 'Aa²¹²mo'o fuu²¹uu' fo³oo Ninfas coon¹³ 'in incaain²¹ inuu tya'a. **16** Mo ngayuui¹³ jøø²øø' 'e jí² lo jee²¹² 'naa' joon síi¹naa' tya' 'in jai² líi² Cristo néei¹ Laodicea. Jøø²oo' jon 'e jí² ga'ii²¹ 'in néei¹ Laodicea. **17** Síi¹³ii' Arquipo: "Tyán² cwáain¹ 'e untiin¹³mo'o røø²¹ jilaa²¹ to² 'e gacwo¹ Ña'ñu¹u' 'nu ijmaa²a."

18 Jna-a, Poo², jmóo³oo 'e júu³ lo coon¹³ cwóo³oo. Untii¹³i-oo' 'e 'yuu²na 'nuñi³. Cwouncwaai¹³ Dios Jmii²¹ 'naa'. Amén.